



Rabu, 04 September 2024

**Ogen: Kejadian 26:7-10**



**"Seh Kal Jilena"**



**R**ibka erjabu ras Ishak, janah Padan Dibata man bana tupung terjadi kelihen mulihi i negeri i ja ia ringan; nina Tuhan "Ola kam lawes ku Mesir. Tetaplah kam ringan i bas negeri enda, i basingan si Kukataken man bandu. I jenda me kam ringan, Aku si nemani kam ras si masu-masu kam". Ishak patuh nandangi kai si iperentahkan Dibata janah tetap ia tading ras ringan i Gerar raduken ndeharana Ribka ras keluarganya kerina. Ribka selaku ndehara Ishak sekalak diberu si seh kal jilena. Kinijilenna e peturah kebiaran bas Ishak selaku perbulangenna, erkiteken kebiarenna maka ikataken Ishak man kalak Ribka eme turangna. Kinijilen Ribka erbahansa Ishak erbual man kalak si nungkun man bana kerna status Ribka, sabap mbiar ia ibunuh kalak guna ndatken Ribka. Perbahanen Ishak enda dungna ieteh Raja Abimelek janah mpebetehkenca man rayatna maka ise pe la banci nggagasi Ishak ras Ribka, janah ise kalak si nggagasiswa la banci lang ibunuh nina raja Abimelek. Kebiaren Ishak kedungenna ndatken ketenengen arah perbahanen raja.

"Seh Kal Jilena" e me renungennta wari enda; arah tema enda tentu sura-suranta maka kinijilen sekalak moria labo terjeng rupa ngenca tapi kinijilen pusuh rikut pe ras perukuren. Kinijilen pusuh ras perukuren erbahansa malem ate perbulangenna natap-natapsa rikut pe ras keluarganya. Kinijilen si bereken Tuhan jadi dalanta lako mpermuliaken IA i bas kegeluhenta. Penting kal man banta Moria guna makeken pemere Tuhan e alu payo ras benar. Moria arus ngasup maba kinijilenna guna kiniraturen doni enda; Moria arus ngasup makeken pemere Tuhan alu mehuli.

Sabap lit kuan-kuan Karo ngatakenca: rupa mejile baban ku tiga nge ngenca tapi perukuren si mehuli mabai kiniulin man doni enda. Marilah si pakeken kinijilenta guna erbahanca malem ate perbulangenta dinggen terpuji gelar Tuhanta.